

楊仁山居士述

(再版)

佛
教
初
學
課
本
註
解

世界佛教居士林印行

上海海寧路錫金公所內

自敘

釋教三字經者。明季吹萬老人效世俗訓蒙之書而作也。敏修長老爲之註釋。流傳二百餘年矣。頃者普陀印光法師從而新之。正文改十之三。註釋改十之七。原本編爲兩排者。改而爲一排。考據精詳。文辭圓潤。超勝舊作。而題名之處。不將重訂者列於其次。可謂坦然忘我者矣。予不揣固陋。率爾改作。與新舊二本迥不相同。事略而法備。言簡而義周。人有勸予易其名者。因名之爲佛教初學課本云。

光緒三十二年春二月石埭楊文會仁山氏識時年七十

佛教初學課本目錄

法界

釋迦佛生

結集三藏

大法東來

十宗

成實宗

俱舍宗

禪宗

律宗

天台宗

賢首宗

慈恩宗

三論宗

密宗

淨土宗

懺法

諸法

五蘊

六根

六塵

十二處

十八界

轉八識成四智

三身

五眼

六通

四諦

十二因緣

六度

四無量心

涅槃四德

十界

器世間

勸學

敘述古德

餘韻

佛教初學課本註

石埭楊文會仁山述

法界

無始終

時劫遷流。皆是衆生妄見。證道之人。長劫入短劫。短劫入長劫。故知無始終也。

無內外

一塵現法界。法界入一塵。何內外之有。

強立名

本無可名。爲化衆生。強安名耳。

爲法界

卽有之空。一法不立。卽空之有。萬法齊彰。

法界性

真妄平等。
同一體性。

卽法身

十界同具。
無有差別。

因不覺

以不達一法界。
故心不相應。

號無明

忽然念起。
名爲無明。

空色現

楞嚴經云。晦昧爲空。空晦暗中。結暗爲色。又云。空
生大覺中。如海一漚發。有漏微塵國。皆依空所生。

情器分

有情世間。器世
間。由此建立。

三世間

并正覺世間。
是謂三世間。

從此生

從如來藏變爲阿賴耶。從阿賴耶變起根身器界。又從轉阿賴耶而顯如來藏。則成正覺世間。所謂無不從此法界流。無不還歸此法界也。

迷則凡

迷之則爲六凡。

悟則聖

悟之則爲四聖。

眞如體

無有可遣。以一切法悉皆眞故。亦無可立。以一切法皆同如故。

須親證

唯證乃知。難可測。若以思惟心推求。如取螢火。燕須彌山。終不能著。

釋迦佛生

證者誰

隨分證入者。則不問。專問證入究竟者。是爲誰耶。

釋迦尊

釋迦牟尼如來爲三界獨尊。是賢劫千佛中第四佛也。

大悲願

諸佛因地。皆以大悲願力而行菩薩道。

示誕生

釋迦應迹從兜率天退。降神迦維羅衛國。父名淨飯。母名摩耶。處胎十月。從右脅生。名爲薩婆悉達。在周昭王二十四年四月八日也。○此是應身佛八相成道一

從兜率天退。二入胎。三住胎。四出胎。其餘四相詳在下文。大乘見佛在母胎中。住大寶樓閣。度無量衆生。故有住胎相。小乘不見。

處王宮。求出離

悉達太子在王宮中。種種技藝。迴超凡流。五欲之樂。無不具備。十九歲時。遊觀四門。見老病死。生厭離心。忽遇沙門。生欣慕想。遂欲出家。

父王防衛嚴密。

夜踰城。人不知

淨居諸天。令彼軍士綵女。悉皆昏睡。至夜半時。太子乘馬。四天王捧馬足。踰城而去。人不覺知。遂得剃髮易服而爲沙門。○此是第五出

相家

入雪山修苦行

既出家已五年遊歷偏訪諸仙種種論議知非正道遂入雪山日食一麻一麥勤修苦行

六年間習寂定

在雪山中結跏趺坐先學不用處定三年知非遂捨又學非想定三年知非亦捨

從定起出山來

即出雪山詣尼連河沐浴受食時年已三十矣

坐樹下心鏡開

菩提樹下有金剛座賢劫千佛皆坐此座入金剛喻定

天龍喜

諸天龍王歡喜讚歎大興供養

魔膽落

魔王波旬見其宮殿無故墜裂先遣魔女媚之再遣魔軍怖之皆不能動魔王震懾舉衆降服○大乘有住胎無降魔小乘有降魔無住胎乃大小二乘所見八相

成道之
異也。

觀明星成正覺

忽觀明星廓然大悟。即成無上正覺。歎曰。奇哉。一切衆生。具有如來智慧德相。但以妄想執著。不能證得。若離妄想。一切智。無師智。自然

智。即得現前。○此
是第六成道相。

啓大教說華嚴

佛初成道。首演大
法。是謂第一時教。

塵刹海現寶蓮

華嚴會上。佛現法界無盡身雲。住華藏莊嚴世界海。有佛刹微塵數
大寶蓮華。一時出現。身刹互融。無盡重重。重重無盡。惟法身大士方

能見
之。

愍凡愚不能聽

凡小之機。不見不聞。
如來愍之。爲說小法。

隱尊特顯劣應

尊特者。剎塵相好之身也。佛非隱顯。隱顯隨機耳。劣應者。文六身也。在色究竟天所現之高大身。名爲勝應身。教化菩薩居鹿野苑。現丈

六身。教化凡夫二乘。若是圓機。見此文六。卽見無盡相好之身。

說阿含第二時

阿含經。後人集爲四部。增一阿含。中阿含。長阿含。雜阿含也。一一部內。有各種經。

四諦法接小機

苦集滅道四諦。爲接小機而說。

證四果出生滅

修聲聞法。證入四果。以爲究竟。卽阿羅漢是也。旣證此果。生滅滅已。寂滅爲樂。

演方等

第三時教。彈偏斥小。歎大褒圓。卽維摩楞伽等經是也。

破法執

二乘但破人我執。出分段生死。佛說方等經。破法我執。出變易生死。入菩薩地。

第四時談般若

般若如大火聚。觸著即燒。般若如清冷水。滌除塵垢。佛說此法。燒之滌之。令一切世間法。出世間法。究竟清淨。其經即八部般若等是也。

二乘轉教菩薩

般若會上。羅漢弟子當機請法。佛為廣談般若妙諦。令其轉教菩薩。此是法華會上佛付家業之先導也。

開顯圓法華會

第五時說法華經。開權顯實。為純圓之教。

學無學得授記

三果已還。皆名有學。唯第四果。名為無學。他經唯菩薩蒙佛授記。法華經授聲聞記。不但無學。即有學亦蒙授記。誠為希有。授記者。佛記

弟子當來成佛。名字若何。國土若何。法住時劫等事。聞者慶幸無量。

涅槃經最後說

說法華後。即說涅槃。通為第五時教。即是臨涅槃時所說也。

顯真常

真常不變。是名涅槃。

扶戒律

佛勅弟子以戒爲師。戒律精嚴。則佛法能久住也。

五時教如是說

釋迦如來一代聖教。天台判爲五時。如上文所說。

亦融通

通而言之。五教中。隨一一教。皆徧五時。所謂一切時中。說圓融無盡法。皆名華嚴教。說聲聞法。皆名阿含教。乃至說會三歸一之法。皆名法華教。餘可類推。

亦分別

別而言之。佛初成道。三七日中說華嚴經。十二年說阿含經。八年說方等經。二十二年說般若經。八年說法華經。一日一夜說涅槃經。共成五十年說法度生也。○

以上三十二句是

第七轉法輪相。

化道圓

化度衆生之道。圓滿具足。

歸真際

攝末歸本也。

雙樹間吉祥逝

佛在拘尸那城娑羅雙樹間。右脅而臥。默然示寂。右脅名爲吉祥。是時大地震動。日月無光。雙林變白。江湖枯涸。人天號泣。聲震大千。

是爲第八
入涅槃相。

闍毗後分舍利

依法闍毗。凡火皆不能燃。佛從胸中自發聖火。乃能化盡。得舍利八斛四斗。遵佛遺囑。分爲三分。諸天得一分。龍王得一分。八大國王共

得一分。八王均分。阿闍世王得八萬四千粒。藏恆河中。作千歲燈供養。

阿育王變古制

佛滅度後一百年。天竺有鐵輪王。名曰無憂。卽阿育王也。取阿闍世王所藏舍利。分佈南洲。

碎寶末造浮圖

碎七寶末。造八萬四千塔。

役鬼神徧闍浮

役使鬼神徧闍浮提。同時安置。在震旦國有十九處。此時所能見者。唯明州鄞山一處耳。

優填王始造像

佛昇忉利天爲母說法。三月安居。優填王渴仰如來。無由得見。發意造像。目連尊者攝三十二匠。昇天瞻視佛光耀目。乃至池側。令匠觀

水中影。凡三返。像始造成。後佛從天而下。像自出迎。佛摩頂記之。

令後人修供養

自此以後。王臣士庶造佛像者。不可勝數。去佛久遠。能於像前供養瞻禮。皆優填王發起之力也。

結集三藏

大迦葉命阿難結集經石窟間

摩訶迦葉集諸比丘得神通者。悉詣耆闍崛山。畢鉢羅窟。結集法藏。無令斷絕。阿難未得

漏盡。拒而不納。後證阿羅漢果。乃能入會。

脩多羅是經藏

迦葉尊者先命阿難結集經藏。契理契機。故名契經。

毗奈耶是律藏

次命優波離結集律藏。止惡修善如世法律。

阿毗曇是論藏

復命阿難結集論藏。問答決擇諸法性相故名論也。

正法隆

三藏教典流傳世間。能令正法常住不滅。

外道喪

佛教盛行於世。西竺九十五種外道。漸漸消亡。利根者轉邪歸正。而證道果矣。

藏分三

藏卽含藏之義也。謂經律論三。各含文理。故名三藏。

部十二

一曰長行。直說法相。隨其義理長短。不以字數爲拘也。二曰重頌。應前長行之文。而重宣其義。天竺八字成句。四句爲偈。翻譯華文。或五字句。或七字句。各隨其便。三曰授記。如來爲諸菩薩聲聞。授成佛記。四曰孤起。不頌長行。直說偈句。亦四句爲一偈。五曰無問自說。如來以他心智。觀衆生機。而自宣說。六曰因緣。如來所說一切根本緣起之事。

七日譬喻。如來假譬喻以曉示之。令人開解。八曰本事。說諸菩薩弟子因地所行之事。九曰本生。說佛菩薩本地受生之事。十曰方廣。大乘方等經典。其義廣大。猶如虛空。十一曰未曾有。現大神變。不思議事。十二曰論議。問答辯論諸法之事。以上十二部經。亦名十二分教。或有一經只具一分。或有兼數分。具足十二分者。則未之見也。

遇有緣作佛事

如來以平等大悲普度衆生。衆生受化因緣千差萬別。因緣不具者。佛在當處。不聞不見。佛滅度後。三藏十二分教流佈世間。遇有緣者。

即能作如來度
生之事業也。

大法東來

漢明帝夢金人求聖教遣蔡愔

東漢明帝永平七年。帝夢金人身長丈餘。項有圓光。飛至殿庭。日間羣臣。太史傅毅奏曰。

臣覽周書異記。載昭王時。有五色光入貫太微。太史蘇由奏曰。有大聖人生於西方。故現此瑞。一千年後。聲教及此。王勒石記之。陛下所夢。將必是乎。帝納其言。即遣中郎將蔡愔等十

八人往西域求佛法。

騰蘭來經像至

惜等至中天竺月氏國。遇梵僧攝摩騰竺法蘭二人。奉佛經像。返至洛京。館於鴻臚寺。後建精舍。因白馬馱經而來。因名之爲白馬寺。

初譯經四十二

最初譯出四十二章經。是爲法寶流傳震旦之始也。

道教徒興惡念。請焚經。爲試驗。道經燬。佛經全。光熾盛。耀人

天

五嶽道士褚善信等千二百人。上表求試真僞。帝許之。乃築三臺。分置釋道經典。舉火焚之。道經頃刻俱燼。佛經光燄煥發。纖毫無損。攝摩騰竺法蘭踊身虛空。而說偈曰。狐非師

子類。燈非日月明。池無巨海納。邱無嵩岳榮。法雲垂世界。法雨潤羣萌。顯通希有事。處處化羣生。道士中六百餘人。皈依佛教。

善男女皆生信。求出家。期現證

司空劉峻等二百六十人。京師士庶二百九十人。後宮陰夫人王婕妤并綵女等一百九

十人見此神異俱求出家。期於現證聖果也。

建十寺。安僧尼

明帝許可。勅建十寺。城外七寺。安僧。城內三寺。安尼。

三寶備。始於茲

住世三寶。從此備矣。

十宗

溯源流。知宗派

佛爲本源。後學爲流派。各家所宗不同。所謂歸元無二路。方便有多門也。

宗有十。分小大

略舉十宗。有小乘。有大乘。下文詳述。

成實宗

成實宗。六代盛。高僧傳。可爲證。

如來滅後九百年中。訶梨跋摩取諸部所長。作成實論。釋成三藏中之實義。姚秦鳩摩羅

什譯出。震旦諸師多造章疏。見於高僧傳。後代式微矣。

俱舍宗

俱舍宗。陳至唐。五代後。漸微茫。

世親菩薩造俱舍論。在聲聞對法藏內。最爲精妙。陳真諦三藏譯出。并作疏釋之。佚失不

傳。唐玄奘法師重譯三十卷。門人普光作記。法寶作疏。盛行於世。有專門名號者。遂立爲一宗焉。至五代後。學者競習禪宗。俱舍一門置之高閣矣。

此二宗。是小乘。

成實。俱舍。

律小大

十誦四分等。是小乘。梵網瓔珞等。是大乘。

七大乘

禪宗。天台宗。賢首宗。慈恩宗。三論宗。密宗。淨土宗。

禪宗

傳心印爲禪宗

佛之心印。卽是般若波羅密。五祖令人誦金剛般若經。六祖稱爲學般若菩薩。皆以般若爲心印也。後人名爲禪宗。是出世間上上禪言。

語道斷。心行處滅。
始有少分相應。

佛拈花。迦葉通

世尊在靈山會上。拈花示衆。是時衆皆默然。唯迦葉尊者破顏微笑。世尊曰。吾有正法眼藏。涅槃妙心。實相無相。微妙法門。不立文字。教

外別傳。付囑摩訶迦葉。○問曰。如來心印。獨付迦葉。何也。答曰。佛在世時。悟道之人。佛爲印證。佛滅度後。若無正傳。恐落偏邪。故以迦葉爲初祖。次第相傳。并付衣鉢表信。世人悟道。必受祖師印證。方可自信。列祖住世。雖悟道弟子。如麻似粟。而付法傳衣。必待其人。可見三十三代祖師。皆於靈山會上一時印定矣。

授阿難爲二祖

阿難尊者多聞第一。持佛法藏。乃迦葉以別傳之旨授之。蓋以二門不相離也。

次第承皆可數

載在付法藏因緣傳。茲不具述。

第十二號馬鳴

應佛懸記。於六百年時。生於中印度。摧伏外道。興隆正法。繼富那夜奢尊者之後。而紹祖位。若尅其本。大光明佛。若校其因。八地菩薩。

造起信大乘興

馬鳴大士。宗百部大乘經。造起信論。以一心二門。總括佛教大綱。學者能以此論爲宗。教律禪淨。莫不貫通。轉小成大。破邪顯正。尤爲如

來真子矣。

十四祖名龍樹

唐譯楞伽經。如來懸記云。未來世當有持於我法者。南天竺國中大名德比丘。厥號爲龍樹。能破有無宗。世間中顯我無上大乘法。得初

歡喜地。往生安樂國。魏譯楞伽亦同此文。龍樹菩薩證得初地。傳佛心宗。又生安樂國。承事阿彌陀佛。禪宗後學。可不以此爲法乎。

入龍宮華嚴遇

華嚴經亦名大不思議經。尊者入龍宮。見有三本。上本有十三千大千世界微塵數偈。一四天下微塵數品。中本有四十九萬八千八百

偈。一千二百品。此二本皆非闍浮提人心力能持。乃誦下本十萬偈。四十八品而出。

傳世間法雨澍

返至人間。寫成梵筴。五天竺國。方知有華嚴經出現於世。僧俗二衆。奉爲至寶。

造諸論施甘露

龍樹菩薩造大不思議論十萬偈。釋華嚴經。今所傳十住毗婆沙論。卽是彼論釋十地中初之二地。又造無畏論十萬偈。中論出其中。又

造釋摩訶衍論。闡揚馬鳴菩薩起信論云。該攝百洛叉契經奧義。勉後學研究也。

廿八祖達摩尊來東土示性真

菩提達摩尊者。南天竺國香至王第三子也。姓刹帝利。得法於般若多羅尊者。承師遺命。

泛海達廣州。在梁普通元年。刺史表聞於朝。武帝迎至金陵。帝問曰。朕造寺寫經度僧。不可勝紀。有何功德。答曰。並無功德。此但人天小果。有漏之因。如影隨形。雖有非實。帝曰。如何是

真功德。答曰。淨智妙圓。體自空寂。如是功德。不以世求。帝又問。如何是聖諦第一義。答曰。廓然無聖。帝曰。對朕者誰。答曰。不識。帝不悟。祖知機不契。遂渡江。屆洛陽。止於嵩山少林寺。面壁而坐。人莫能測。後世稱爲東土初祖。

離文字。要親證

達摩尊者。見東土有大乘氣象。應時而來。專接利根上智。令脫名言習氣。識自本心。見自本性。直下與諸佛無異。此是頓超之法。非小機

所能領會也。

有慧可。得心印

二祖慧可。原名神光。武牢姬氏子。少通世典。長習竺墳。出家後。善大小乘。定中見神人。指示南詢。得參初祖於少林。勤懇備至。莫聞誨勵。

冬夜侍立。積雪過膝。繼而斷臂求法。祖始易其名曰慧可。問曰。我心未甯。乞師與安。祖曰。將心來與汝安。可良久曰。覓心了不可得。祖曰。我與汝安心竟。後付袈裟。以表傳法。卽說偈曰。吾本來茲土。傳法救迷情。一花開五葉。結果自然成。又曰。有楞伽經四卷。亦用付汝。卽是如來心地要門。令諸衆生開示悟入。○不立文字。是一種方便。若執爲定法。則自誤誤人矣。當

知摩訶迦葉。承佛付囑。爲第一祖。至佛滅後。卽以結集法藏爲當務之急。及其傳心。不傳之他人。而傳之多聞總持之阿難。後來世世相承。莫不造論釋經。宗說兼暢。達摩西來。得其傳者。爲精通內典之慧可。儻慧可未通教義。豈能識達摩之高深哉。及至六祖。始示現不識文字之相。以顯無上道妙。要在離言親證。非文字所能及也。後人不達此意。輒以不識字比於六祖。何其謬哉。不觀夫達摩隻履西歸乎。魏主聞而啓棺。僅隻履存焉。其表法之意。殆以宗教兩門。傳於東土者。只一門耳。否則宋雲所見之相。豈無所表而然哉。當時宋雲問達摩何處去。答曰。西天去。誌公已說達摩是觀音化身。所云西天去者。卽阿彌陀佛。極樂世界也。觀其付法之後。并付楞伽。其方便善巧。豈凡情所能測耶。

傳僧璨爲二祖

二祖在北齊時。有一居士。年踰四十。不言姓氏。來問祖曰。弟子身纏風恙。請和尚懺罪。祖曰。將罪來與汝懺。士良久曰。覓罪了不可得。祖

曰。與汝懺罪竟。宜依佛法僧住。祖知是法器。卽爲剃髮受具。命名僧璨。疾亦漸愈。執侍二載。付以衣法。

信心銘超今古

後住舒州皖公山。往來於太湖縣司空山。作信心銘六百言。流傳於世。

第四祖名道信。知無縛。解脫竟。

道信爲沙彌時。謁三祖曰。願和尚慈悲。乞與解脫法門。祖曰。誰縛汝。曰。無人縛。祖曰。何更

求解脫乎。信於言下大悟。服勞九載。祖試以立微。知其緣熟。乃付衣法。信。蘄州人。姓司馬氏。後住蘄春破頭山。

五祖忍

祖名宏忍。黃梅人也。前生爲破頭山栽松道者。請於四祖曰。法道可得聞乎。祖曰。汝已老。脫有聞。其能廣化耶。儻若再來。吾尙可遲汝。乃去。至水邊。乞浣衣。女子寄

宿。女歸而孕。父母大惡。逐之。後生一子。棄港中。明日見其泝流而上。氣體鮮明。驚異。育之。童時遇四祖。祖問曰。子何姓。答曰。姓卽有。不是常姓。祖曰。是何姓。答曰。是佛性。祖曰。汝無姓耶。答曰。性空。故無。祖默識其法器。卽令出家。付以衣法。

居黃梅東山上道場恢

繼四祖住破頭山。後遷黃梅東山。宗風大振。

第六祖名慧能

姓盧。嶺南新州人。家貧。鬻薪供母。聞人誦金剛經。問所由來。遂往黃梅參五祖。祖驗知根性太利。令人碓坊舂米。人稱盧行者。經於八月。

祖勅會下各述一偈。以表心得。上座神秀題壁曰。身是菩提樹。心如明鏡臺。時時勤拂拭。莫使惹塵埃。盧行者聞之。亦作一偈。請張別駕書於秀偈之側。偈曰。菩提本無樹。明鏡亦非臺。本來無一物。何處惹塵埃。

傳衣鉢

祖潛詣碓坊。示以密機。盧卽三鼓入室。祖付囑心傳。并受袈裟。盧問。法則旣受。衣付何人。祖曰。昔達摩初至。人未之信。故傳衣以明得法。今信心已熟。衣乃爭端。止於汝身。不復傳也。是夜南邁。衆莫之知。

道大行

六祖旣至嶺南。隱於四會獵人隊中。經十五載。一日至廣州法性寺。夜間風颺。刹旛二僧對辯。一曰旛動。一曰風動。祖曰。不是風動。不是旛動。仁者心動。一衆竦然。乃集諸名德。爲祖剃髮。授滿分戒。昇座說法。聞者傾心。別傳之道。由此大行。

六祖下。二禪師

得法弟子。見於記載者。四十三人。其中最顯著者。有二大德。

南嶽讓

懷讓禪師。金州杜氏子。由嵩山往曹溪禮六祖。祖曰。何處來。曰。嵩山。祖曰。什麼物。恁麼來。曰。說似一物。卽不中。祖曰。還可修證否。曰。修證卽不無。汙染卽不得。祖曰。

只此不汙染。諸佛之所護念。汝既如是。吾亦如是。後往衡嶽居般若寺。

青原思

行思禪師。參六祖。問曰。當何所務。卽不落階級。祖曰。汝曾作什麼來。曰。聖諦亦不爲。祖曰。落何階級。曰。聖諦尙不爲。何階級之有。祖深器之。後住吉州青原山靜居

寺。

南嶽下。一馬駒踏殺人。徧寰區

道一禪師。漢州什邡縣人。姓馬氏。故俗稱馬祖。習定於衡嶽。遇讓和尚。發明大事。先是六

祖謂讓曰。西天般若多羅。識汝足下。出一馬駒。踏殺天下人。馬祖應識而出。住洪州開元寺。得法弟子八十餘人。分化十方。水潦和尚。初參馬祖。問如何。是西來的的意。祖曰。禮拜著。師纔禮拜。祖乃當胸踏倒。師大悟。起來拊掌呵呵大笑曰。也大奇也。大奇。百千三昧。無量妙義。祇向一毫頭上。識得根源去。

青原下一石頭石頭路滑似油

南嶽石頭希遷禪師。端州陳氏子。在曹溪薙染得法於青原。衡山有石狀如臺。乃結庵其

上時號石頭和尚。著參同契二百餘言行世。鄧隱峯辭馬祖。祖曰。甚麼處去。曰。石頭去。祖曰。石頭路滑。曰。竿木隨身。逢場作戲。便去。纔到石頭。卽繞禪牀一匝。振錫一聲。問是何宗旨。石頭曰。蒼天蒼天。峯無語。卻回。舉似祖。祖曰。汝更去問。待他有答。汝便噓兩聲。峯又去。依前問。石頭乃噓兩聲。峯又無語。回舉似祖。祖曰。向汝道石頭路滑。

分五家派各別

僧問天隱修禪師。如何是臨濟宗。師曰。怒雷掩耳。如何是滄仰宗。師曰。光含秋月。如何是曹洞宗。師曰。萬派朝源。如何是雲門宗。師曰。乾

坤坐斷。如何是法眼宗。師曰。千山獨露。

臨濟宗

馬祖傳百丈。百丈傳黃檗。黃檗傳臨濟義玄禪師。住鎮州滹沱河側。是謂臨濟宗。

行棒喝

臨濟問黃檗。如何是佛法的大意。檗便打。如是三問。三度被打。後參大愚。得悟。黃檗宗旨。卻回黃檗。機鋒迅捷。檗便打。師便喝。以後接人。棒喝交馳。師云。有時一

喝如金剛王寶劍。有時一喝如踞地師子。有時一喝如探竿影草。有時一喝不作一喝。用世人稱爲臨濟四喝。

玄要分

師云。大凡演唱宗乘。一句中須具三立門。一立門須具三要。有權有實。有照有用。汝等諸人作麼生會。

賓主別

四賓主者。賓看主。主看賓。主看主。賓看賓。皆是辨魔揀異。知其邪正。

人與境奪不奪

師曰。我有時奪人不奪境。有時奪境不奪人。有時人境俱奪。有時人境俱不奪。後學稱爲四料揀。

滄仰宗

百丈傳靈祐禪師。住潭州滄山。滄山傳慧寂禪師。住袁州仰山。是謂滄仰宗。

示圓相暗機投義海暢

仰山於耽源處受九十七種圓相。後於滄山處因○相頓悟。乃云。我於耽源處得體。滄山處得用。賓主酬答。或畫⊕

相。或畫⊕相。或畫⊙相。或畫⊗相。有暗機。有義海。種種變現。人莫能測。

曹洞宗

石頭傳藥山。藥山傳雲巖。雲巖傳良价禪師。住瑞州洞山。洞山傳本寂禪師。住撫州曹山。是謂曹洞宗。

傳寶鏡

雲巖晟禪師以寶鏡三昧授洞山。洞山付曹山。皆是悟道後。以此證心。祕密相傳。不令人知。被人盜聽。方行於世。

定君臣行正令

洞山立五位君臣以爲宗要。并作五頌申其大旨。

雲門宗

石頭傳天皇。天皇傳龍潭。龍潭傳德山。德山傳雪峯。雪峯傳文偃禪師。住韶州雲門。是謂雲門宗。

顧鑿啖

師逢僧必特顧之。曰鑿。僧擬議。則曰啖。門人錄爲顧鑿啖。

一字關透者希

師因學人來問。每以一字答之。時人謂之一字關。罕有知其旨趣者。

法眼宗

雪峯傳玄沙。玄沙傳羅漢。羅漢傳文益禪師。住金陵清涼院。是謂法眼宗。

明六相

華嚴初地中六相義。師嘗舉示學人。謂真如一心爲總相。出生諸緣爲別相。法法皆齊爲同相。隨相不等爲異相。建立境界爲成相。不動自位爲壞相。

禪與教無兩樣

并說三界唯心。萬法唯識。以融宗教。山堂讎曰。重重華藏交參。一一網珠圓瑩。風柯月渚。顯露真心。煙靄雲林。宣明妙法。云云。○佛學之

高。莫如禪宗。佛學之廣。莫如淨土。禪宗揀根器。淨土則普攝。今時尚禪宗者。輕視淨土。豈知馬鳴龍樹現身說法。早已雙輪齊運矣。蓋禪宗所最難處。在不受後有一著。儻死生不能自由。則隔陰之迷。決不能免。就生平所見所聞。確有證據。從僧中來者。歷歷可數。上焉者。定境時時現前。眼中靜夜發光。讀書過目不忘。作文倚馬可待。而勸其學佛。決不肯從。此何故也。蓋前生參禪有得。一味掃除。佛見法見。掃得淨盡。自以爲超佛越祖矣。僅轉一世。已至於此。再轉幾世。何堪設想。下焉者。當用功時。強制妄念。遏捺其心。如石壓草根芽。潛萌及至來世。雜染習氣。一時頓發。貪財好色之心。倚修行勢力。過人百倍。庸福富盡。死入三塗。豈修因時所逆料哉。亦有不受人身。而生天道者。美則美矣。其如報盡何。是等皆由未諳教義。發長劫修行之願。欲以一生了事。自謂捨報之後。常住涅槃。而不知剎那之間。已受後有矣。然則如之何而可也。是在隨根授法耳。利根上智。方可學教外別傳之法。至徹悟心源後。仍須看教。

念佛。期生淨土。以免退墮。追隨永明。楚石諸公。豈不偉歟。中下之機。唯應依教勤修。不可妄希頓悟。法不投機。徒勞無益。欲習禪定。有天台止觀可學。次第禪。圓頓禪。行之均能獲益。究極而言。必以淨土爲歸。所謂百川異流。同會於海也。

律宗

既明宗

傳佛心印。名之爲宗。五家綱要。略說如前。

須知律

戒律爲持身之要。學者不可不知。

持五戒

不殺生。不盜。不淫。不妄語。不飲酒。

本乃立

爲一切戒法之根本。

爲沙彌持十戒

即前之五戒。加第六不著香華鬘不香塗身。第七不歌舞倡伎不往觀聽。第八不坐高廣大牀。第九不非時食。第十不捉持生像金銀寶

物

比丘僧具足戒戒二百又五十

詳在四分戒本茲不具述

尼增百戒始足

比丘尼三百五十戒。詳在四分比丘尼戒本。以上僧尼二衆具戒須出家後從律師傳授非可預知。

梵網戒制菩薩重有十輕四八

梵網經中說十重戒四十八輕戒。制諸菩薩受持是謂盧舍那佛所授金剛寶戒。

律門祖優波離

尊者在佛座下先受戒品。十大弟子中持戒第一。

承佛印肅清規

佛印尊者爲衆綱紀。

先束身。次攝心。

尊者自云。我以執身。身得自在。次第執心。心得通達。

得圓通。證道深。

然後身心一切通利。卽證圓通矣。

唐道宣。精毗尼。

京兆錢氏。梁祐律師之後身也。出家後。戒律精嚴。著述甚富。諸天送食衛護。詳載天人感通傳。師住終南山。後人稱爲南山宗。

大小乘。咸總持。

律有大小二乘。宣公以小乘律釋通大乘。立爲圓宗戒體。

宋元昭。繼其後。

餘杭唐氏。專學毗尼。博究南山一宗。住西湖昭慶寺。結蓮社。嘗云。生宏律範。死歸安養。平生所得。唯二法門。先後主靈芝寺三十年。時人

稱爲靈芝大師。

著述多。善分割。

宣公所著律門典籍。元昭剖析精微。輔翼流傳。今從海東得來。律學其再興乎。

既明律。須研教。

天竺僧規。初出家者。五年學律。五年學經。始入下座。道業增進。昇爲中座。再加增進。昇爲上座。方能綱紀後學。

辨權實。判大小。

權實莫辨。大小不分。則觸途成滯。何能通經。下文所列闡教諸宗。皆可爲後學準繩也。

天台宗一名法華宗

北齊朝有慧文

北齊擾亂之時。姓里失考。

讀中論得其精

師讀龍樹菩薩中論偈云。因緣所生法。我說卽是空。亦名爲假名。亦名中道義。遂悟入三觀旨趣。

祖龍樹立三觀。空假中歸一貫

空觀順真諦。假觀順俗諦。中觀順第一義諦。或用次第三觀。從假入空。從空入假。從空假

入中道。或用通相三觀。一空一切空。假中皆空。一假一切假。空中皆假。一中一切中。空假皆中。或用一心三觀。一念心中三觀具足。此三種後勝於前。

傳弟子南嶽思

名慧思。世稱思大禪師。武津李氏子。梁時人。依慧文禪師。悟入法華三昧。及旋陀羅尼門。後居南嶽勝境。

止觀法萬世師

所著大乘止觀。中土失傳。宋時由海東傳來。後人奉爲圭臬。

第三世有智者

名智顛。隋帝稱爲智者大師。生荊州華容陳氏。十八出家。師事慧思禪師。誦法華經。至藥王品。曰是真精進。是真法供養。如來卽悟法。

華三昧。獲一旋陀羅尼。見靈山一會儼然未散。後住天台山。

演教觀判高下

以五時八教。判釋東流一代聖教。罄無不盡。分晰半滿權實。最爲精當。

藏與通

一小乘三藏教。專接小機。二通教。通前藏教。通後別圓。

別與圓

三別教。獨菩薩法。別前二教。別後圓教。四圓教。圓伏圓信。圓斷圓行。圓位圓自在。莊嚴圓建立衆生。

此四教至今傳

此名化法四教。另有化儀四教。頓漸祕密不定是也。又藏通別圓。一教中分爲六卽。所謂理卽。名字卽。觀行卽。相似卽。分證卽。究竟卽。

談性具善惡兼

台教主張性具法門。謂自性本具善惡等法。方能造十界因果。若非性具。則不能造。他宗專主性善。台宗兼性惡而言。以性惡通於十界。

是與他宗

迴別處。

百界如有三千

一心具十法界。一界中各具十界。是謂百界。百界之中各有十如。是謂千如。五陰一千。衆生一千。國土一千。共成三千世間。以此爲能

觀。以此爲所觀。則成三千妙境。十界者。四聖六凡也。十如者。出法華經。所謂諸法如是相。如是性。如是體。如是力。如是作。如是因。如是緣。如是果。如是報。如是本末究竟等。

此一派號天台

因智者大師住
天台山得名。

宗法華佛慧開

以法華經爲宗。開示悟入佛之知見。有法華玄義
釋籤文句記。止觀輔行。世人稱爲台宗三大部。

賢首宗一名華嚴宗一名法界宗

華嚴經最尊勝

華嚴爲諸經之王。無盡
教海皆從此經流出。

初傳來在東晉

梵僧佛陀跋陀羅在廬山承遠公之意。往天竺求經。得華
嚴前分三萬六千偈。返晉譯於揚州謝司空寺。凡六十卷。

杜順師是文殊

師姓杜。名法順。號帝心。雍州萬年縣人也。生時有乳母來求哺養。滿
三月騰空而去年十五代兄統兵。中途竭薪水。師以桶水束薪供給。

十萬軍用之不盡。十八出家。地神捧盤承髮。神異衆多。不勝枚舉。年八十四入宮辭太宗。昇
太階殿。化於御座。先時有門人辭往五臺禮文殊。及至山麓。遇老人告曰。大士已往長安教
化衆生去也。問爲誰。曰杜順和尚是。
遂兼程而返。至則前一日化去矣。

闡華嚴盤走珠

自華嚴譯出二百餘年。通其義者代不乏人。未若大士之圓轉自如
也。嘗作法界觀。以二千餘言總括華嚴奧旨。投巨火中。一字無損。遂

感華嚴海會菩薩現身讚歎

第一傳得智儼

別號雲華和尚。住終南至相寺。故稱至相尊者。依杜順和尚學華嚴經。盡得蘊奧。年二十七。遇異僧教尋華嚴十地中六相義。豁爾貫通。作華嚴略疏五卷。每卷分本末。爲十卷。題名於大方廣佛華嚴經中。搜立分齊通智方軌。後人稱爲搜立記。並作十立門五十要問答。孔

作搜立記十卷

目章以申其義

第二傳是賢首

名法藏。康居國人。別號國一法師。從儼公研究華嚴。武后建太原寺。命京城大德爲師。薙染授滿分戒。勅住太原寺講華嚴經。承搜立之後。發揮盡致。爲時所宗。尚傳至高麗。元曉法師命弟子分講。盛宏此宗。其餘章疏多種。闡揚一乘妙義。華嚴法門。由此大行。

探玄記世希有

清涼國師。名澄觀。定大休。越州會稽人也。武后時。實叉難陀重譯華嚴經四萬五千偈。成八十卷。世人稱爲新經。賢首既作探立記釋晉

清涼疏釋新經

譯竟復疏新經。僅及數品而逝。後二十七年。清涼乃生。及其作疏。全依賢首模範。得非賢首國師乘願再來乎。

并作鈔博而精

大疏二十卷。隨疏演義鈔四十卷。今以疎鈔合於經文。作二百二十卷。精深淵博。爲世所珍。又有隨文手鏡一百卷。久已失傳。疏貞元新

譯華嚴經四十卷之全文。隱而不見者六百餘年。今復出現於世。

小與始

初小教。佛爲小機。不堪聽受大法。故說四諦十二因緣以引導之。令其證得阿羅漢辟支佛果。二大乘始教。分爲二門。一空宗。明一切皆空。以破法執。二相宗。明萬

法唯識。以融心境。

終與頓

三終教。亦名實教。明如來藏心。二乘闡提悉當成佛。四頓教。別爲一類。離念機。故說一念不生。卽名爲佛。

至於圓

五圓教。一位卽一切位。一切位卽一位。依普賢法界。性相圓融。主伴無盡。身刹塵毛。交徧互入。故名圓教。

五教振

賢首立此五教。以頓教攝禪宗。以圓教該前四。較他宗立教更爲完備。故當時從之者衆也。

四法界

一者事法界。謂諸衆生色心等法。一一差別。各有分齊。故二者理法界。謂諸衆生色心等法。雖有差別。而同一體性。故三者理事無礙法界。謂理由事顯。事攬理成。理事互融。故四者事事無礙法界。謂一切分齊事法。稱性融通。一多相卽。大小互容。重重無盡。故

十玄門

一者同時具足相應門。如海之一滴。具百川味。二者廣狹自在無礙門。如一尺之鏡。見千里影。三者一多相容不同門。如一室千燈光。光光涉入。四者諸法相卽自在門。如金與金色。不相捨離。五者祕密隱顯俱成門。如秋空片月。晦明相並。六者微細相容安立門。如琉璃之瓶。盛多芥子。七者因陀羅網境界門。如兩境互照。傳耀相寫。八者托事顯法生解門。如擎拳豎臂。觸目皆道。九者十世隔法異成門。如一夕之夢。翱翔百年。十者主伴圓明具德門。如北辰所居。衆星皆拱。

暨六相

一者總相。二者別相。三者同相。四者異相。五者成相。六者壞相。一卽具多爲總。多卽非一爲別。互不相違爲同。彼此不濫爲異。一多緣起和合爲成。諸法各住本位。

壞。爲

義最純

杜順雲華二祖。總括華嚴奧義。演出種種法門。精妙絕倫。

因該果。果徹因

因該果海。果徹因源。

攝萬法。歸一真

統攝萬法。歸一真性。

圭峯密

名宗密。住圭峯草堂寺。故稱圭峯禪師。果州西充人也。契荷澤之道。後得清涼所撰華嚴疏鈔。慶快平生。遂承清涼法脈。後人稱爲華嚴第五祖。

疏圓覺

爲沙彌時。授經得圓覺。讀之。心地開通。義天朗耀。後作疏釋經。成一家獨步。

大鈔詳。小鈔略

大疏三卷。大鈔十三卷。略疏兩卷。小鈔六卷。後人以萬言爲一卷。則卷數衆多矣。

此一派賢首宗

開宗判教。至賢首而大備。故以賢首名宗。

亦行布亦圓融

說行布法。圓融即在行布之內。說圓融法。行布即在圓融之中。非但不相礙。亦不相形。智眼觀之。行布圓融皆假名耳。

慈恩宗 一名法相宗 一名唯識宗

唐玄奘遊西域

師表請往西域求經。帝不許。遂私遁出關。備歷艱苦。始抵印度。

學瑜伽祖彌勒

瑜伽師地論。彌勒菩薩造。無著菩薩昇兜率天。請彌勒菩薩降世傳授。但聞其聲。不見其形。流傳西竺。未達東土。奘公特往求之。

依戒賢大論師

西竺稱爲正法藏。居那蘭陀寺。座下萬衆。然公經依之。居上首十人之列。

親傳授。歷年時

依戒賢學瑜伽。歷五年之久。

歸長安

往返之間已十七年矣。

傳窺基

尉遲敬德之猶子也。從奘公出家。英敏絕倫。深得奘公之道。

通因明善三支

奘公譯瑜伽論未畢。有僧盜聽。歸而宣講。門人以告。奘曰。彼雖能講。未通因明。不足取也。乃以因明傳於窺基。基師善用三支比量之法。

能立能破。盜聽者無如之何矣。三支者。宗。因。喻也。廣如因明論說。

成唯識作述記

成唯識論。西竺作者有十家。基師乃啓奘公。欲擷十家之精華。糅成一部。奘公許之。基師自任纂輯之事。而成此書。故梵筵中無此本也。

又以平時所聞於師者。多西竺口授之義。作為述記。以釋論文。

破邪宗伸正義

此書一出。邪宗盡破。正義全伸。釋門之偉烈也。

有現量

無分別智。了法自相。名真現量。有分別智。於義異轉。名似現量。

有比量

藉相觀義。有正智生。名真比量。虛妄分別。不能正解。名似比量。

究竟依聖教量

聖教所說現量比量。印證無違。方可自信。

徧計執

徧染淨法上。執我執法。故名徧計所執。性屬非量。

依他性

依他衆緣而起。故名依他起性。屬比量。

二者離圓成證

遠離依他及徧計執。識心圓明。入圓成實性。屬現量。即是真如自性也。

此一宗號慈恩

因玄奘法師住慈恩寺得名。

先談相後顯真

相不自相。全從識變。識不自識。全依性起。相識俱空。不真何待。

一二論宗一名性宗一名空宗一名破相宗

三論宗傳最古。秦羅什來茲土

鳩摩羅什。龜茲國人。東晉太元七年。秦主苻堅遣將迎師。至姚興時始抵秦。爲譯經師。宏

三論宗

真空義爲第一

般若爲諸佛母。顯第一義空。一切賢聖莫不由此門而得解脫也。

羣弟子競傳習

道生。僧肇。道融。僧叡。曇影。惠觀。道恆。曇濟。皆羅什門下高弟。並習此宗。生公所著論議。與禪宗相同。惜已亡失。肇公諸論。至今傳誦。人謂

達摩未來以前。通達性宗者。實出羅什之門也。

日中論

有五百偈。龍樹菩薩造。青目菩薩釋。破二邊之見。顯中道之理。

日百論

有百偈。提婆菩薩造。正破外道。傍破自餘。

十二門

此論有十二觀門。龍樹菩薩作偈自釋。並破小乘外道。正顯大乘深義。

爲三論

三部均是宗經論。若加大智度論。卽爲四論。智論是釋經論。釋大品般若經故。

唐吉藏

姓安。先世安息人。後遷金陵。而藏生焉。爲道生法師五傳弟子。講三論一百餘遍。法華大品智論華嚴維摩等。各數十遍。曾住會稽嘉祥寺。人稱嘉祥大師。

施大功三論疏傳海東

嘉祥作三論疏四十萬言。傳於海東。今已取來。惟十二門論缺前之二門。聞海東刊板時已無全本矣。

法藏釋十二門宗致記至今存

唐法藏卽賢首國師。作十二門論宗致義記。卷帙完全。可補嘉祥之缺。今已刻板流行矣。

密宗一名真言宗。天竺屬灌頂部。

善無畏

中印度人。事達摩掬多爲師。通達密教。受灌頂法。

至長安

遵掬多之命。入唐行道。於開元四年。齋梵筴始屆長安。適符玄宗之夢。

唐一行受真傳

一行禪師。姓張。鉅鹿人。久依善無畏。三藏盡得其傳。神異顯著。

作疏釋大日經

毗盧遮那佛密宗稱爲大日如來。善無畏三藏譯大毗盧遮那成佛神變加持經七卷。一行筆受密宗稱爲大日經。一行作疏二十卷。又

作釋十四卷。共六十萬言。皆從三藏口授之義。而纂集成文者也。

真言教始得明

後之學密教者。皆以大日經疏釋爲宗。凡稱神變疏鈔者。卽此本也。

金剛智

南印度人。開元七年。泛海達廣州。行道作法。皆著奇驗。翻譯祕密經典多部。

及不空

北印度人。依金剛智爲師。盡傳其道。

接踵來。廣流通

以上四尊者。皆宏密教。神異超羣。當時君臣士庶奉之若佛。

灌頂法。不輕授。非法器。轉獲咎

受灌頂法者。毗盧遮那五智灌頂。頓入佛乘。非具金剛種性。不能傳受。

立禁令。自明始。祕密宗。勅停止

去聖遙遠。人情澆漓。能受此法者。甚爲難得。明時特申禁令。不准傳授密教。恐非其人。反

有害於法門也。佛制建壇行道。若非金剛阿闍黎傳授。卽名盜法。

淨土宗 一名蓮宗

晉慧遠

姓賈氏。雁門樓煩人。博極羣書。尤善老莊。爲道安法師之高弟。

住匡廬

見廬山間曠。可以息心立精舍。感山神。闢地輸材。因名其殿曰神運。卽東林寺也。

結蓮社。德不孤

師專倡淨土法門。道俗皈依者日衆。共結蓮社。得一百二十三人。同願往生極樂國土。

魏曇鸞

雁門人家。近五臺。歷觀聖跡。發心出家。念世壽短促。欲求仙術。以永其年。渡江而南。訪陶隱居。盡得其傳。

修妙觀

還至洛中。逢天竺三藏菩提留支。問以長生之道。留支曰。此方何有不死之法。縱得成仙。終受輪轉。乃以觀經授之。曰。此真不死法也。鸞遂焚仙方。而修妙觀。作往

生論註二卷。支那蓮

宗著述。推爲巨擘。

生品高。瑞相現

臨終之日。華蓋幢旛。高映庭宇。異香芬郁。天樂盈空。人皆見之。知其生品最高也。

唐道綽

姓衛。并州汶水人。十四歲出家。講大涅槃經二十四遍。景慕曇鸞淨土之業。繼其後。塵住玄中寺。道俗赴者彌衆。講觀無量壽佛經將二百遍。瑞應甚多。不可具述。

著有安樂集二卷。現行於世。

賢善導

不知何處人。見西河綽禪師九品道場。講誦觀經。大喜曰。此真入佛之津要也。長安道俗受化往生者不可勝數。人見其念佛一聲。有一光明從口中出。百聲千聲。

亦復如是。著有觀經疏。及各種淨土典籍傳世。

唱專修爲妙道

綽善二公提唱專修。其言曰。修餘行業多劫方成。唯此法門。速超生死。誠爲蓮宗要訣也。

此法門三經說

大藏之中。專說彌陀淨土者。有三部經。

大經該

無量壽經二卷。人稱爲大本。說彌陀因地修行。果滿成佛。國土莊嚴。攝受十方念佛衆生。往生彼國等事。該括無遺。所攝之機。通於聖凡。凡位具攝三輩。唯除五逆。

誹謗正法。其餘均
爲所攝。可謂廣矣。

小經切

阿彌陀經一千八百餘言。人稱爲小本。略說西方淨土依正莊嚴等事。令人執持名號。一心不亂。卽得往生。最爲切要。此經所攝。揀除小善根福德因緣。唯攝一類

純篤
之機。

觀經語最驚人。許五逆得往生

觀無量壽佛經攝機最廣。十惡五逆。臨終苦逼。十聲稱名。卽得往生。或疑十惡五逆之人。

善根全無。佛云何接。答曰。卽五逆中。已可見夙世善根矣。若不見佛。不能出佛身血。若不與羅漢相遇。不能殺阿羅漢。若非自身出家。不能破和合僧。既能出家見佛。見阿羅漢。然後五逆方能具造。其夙世善根正非淺尠。所以聞教回心。其力甚大也。唯誹謗正法者。自生極重障礙。雖聞善知識教。亦不信教。倘能聞卽信服。痛自懺悔。亦得往生。但謗法而能改悔者。實難中之難。是故經文略而不說。○一切衆生本源性地。與十方諸佛無二無別。雖造極重惡業。受無量苦報。而本性未嘗染也。一念回光。如來悉知悉見。以同體大悲。攝歸淨域。決非業

力所能牽纏。世人云帶業往生者。隨情之言耳。實則善惡因果。皆如空花。空本無花。捏目所成。豈有業之體相。爲亡人所帶。而往生淨土者哉。

三藏教所不攝

徧尋教典。唯華嚴經隨好光明功德品。阿鼻獄中。夙根成熟。蒙光頓超。觀經下品下生。罪大惡極。能於急迫之際。脫離極苦。往生極樂。一

切教典所

未曾說也。

佛願力誠難測

彌陀願力。非但凡小不能測度。卽多劫修菩薩道者。亦不能知。

一稱名衆罪滅

至心稱彌陀名號一聲。能滅八十億劫生死重罪。何況淨念相繼。長時無間也。

臨終時佛來接

彌陀光明。徧照十方。念佛衆生。攝取不捨。衆生淨眼未開。不能知見。至臨終時。意根命根齊斷。後念未起。剎那之間。佛現在前。卽脫三界

火宅矣。

下中上根不齊

衆生品類萬別千差
彌陀願力平等無二

一句佛。同生西

千句萬句。卽是一句。前句已滅。後句未生。當念一句。剎那不住。念佛之心。不緣過去。不緣未來。但緣現前一句。以爲往生正因。此是萬修

萬人去之法也。久久純熟。能緣之心。忽然脫落。
無念而念。念卽無念。卽名理一心。生品更高。

既生西。皆不退

此土修行。難進易退。隔陰之迷。言之可怖。修習信心。必經萬劫。入初住位。方得不退。具縛凡夫。一生淨土。卽得不退。所以超勝他宗也。

親見佛。得授記

見佛遲速。在乎此生修行之巧拙耳。既得見佛。聞法歡喜。證無生忍。卽蒙佛授記。得授記已。回入娑婆。慈悲度世。圓滿種種波羅密門。證

入種種菩薩智地。何有一法能出此宗之外耶。

淨土宗。眞簡要

差別中之平等。各宗一致。平等中之差別。各宗不同。求其至簡至要者。無過此宗。他宗難而此宗易。他宗緩而此宗速。不曷擇其易而速。

者行之。而以一門攝一切法門耶。

協時機

法運盛衰。古今易致。當今之世。求其協時逗機者。無如此法。

妙中妙

佛法無一不妙。而淨土法門。尤衆妙中之最妙也。○問曰。佛法平等。君獨稱讚淨土。何也。答曰。今時有識者。莫不以學堂爲重。取喻而言。西方淨土。是極大學堂耳。

彌陀接引十方衆生。往彼就學。供給飲食衣服。不需學費。不定人數。不限年時。其地界廓徹無邊。其建立長遠無極。入其校者。無論何等根器。至證入無生忍時。爲初次畢業。或在彼土進修。或往他方教化。均隨其願。自此以後。歷十住十行十回向。三賢位滿。將入初地時。爲第二次畢業。再從初地以去。至等覺後心。證入妙覺果海。爲第三次畢業。此論次第門。若論圓頓門。一修一切修。一證一切證。圓頓次第。互攝互融。極而言之。十方三世種種教法。無一不備。是故一切諸佛。莫不讚歎。奈何世人流浪生死之中。頭出頭沒。不求出離。其愚爲何如耶。

懺法

上十宗已說完

結上
起下

懺悔法更須探

普賢行願品懺除業障文云。過去世中所作惡業。無量無邊。若此惡業有體相者。盡虛空界不能容受。末云。我此懺悔無有窮盡。學者慎

勿以此生未造惡業。
而不修懺悔法也。

慈悲懺

東土懺法。此爲最古。
後人呼爲梁皇懺。

何人集

徵問
也。

誌公等高僧十

寶誌禪師與高僧
十人共集此懺。

梁武帝心至誠。度故妻脫蟒形

蕭梁武帝之原配郗夫人。嫉妒爲因。死墮蟒
類現形宮中。訴之於帝。求脫苦果。帝請高僧

撰集懺法。建壇行道。後見郗氏冠服來謝。云仗懺力已生天矣。

唐悟達

名知立。姓陳。眉州人。唐懿宗封爲悟達國師。

有夙業

師在漢時爲袁盎說。景帝殺晁錯。以謝七王。晁錯死後。世世欲報此讎。以盎十世爲高僧。不得其便。

人面瘡。生於膝

至唐時。師膺帝王寵遇。榮幸念起。怨家得便。遂附其膝而爲人面瘡。痛不可忍。

遇神僧。爲洗冤

師憶嚮時。調護癩僧。供給備至。僧臨別。囑曰。子後有難。可往西蜀茶籠山相尋。至是往訪之。僧出而相迎。告以所苦。僧曰。巖下有泉。明日

濯之
即愈。

三昧水。澆卽痊

黎明引至泉所。瘡作人言。具述夙因。且曰。蒙迦諾迦尊者。洗我以三昧之水。從此不與汝爲冤矣。掬水一澆。其瘡卽愈。回顧僧寺。已失所

在。

作水懺後世傳

因作慈悲三昧水懺
法三卷傳之後世。

如法行利無邊

世人但能至誠懺悔。解冤釋結。捷如影響。此懺及前文所述梁皇懺。并依佛經所集各種懺法。皆是利生之寶筏也。

諸法

爲學者須知法

世間法。出世間法。略說萬法。廣說無量。

染與淨

隨生死流。名染法。六凡法也。逆生死流。名淨法。四聖法也。

善分別

智慧觀察。捨染還淨。方是修行之正軌也。

五蘊

色受想并行識

色卽質礙。受卽領納。想卽思想。行卽遷流。識卽了別。初一是色。後四是心。

此五蘊

蘊者積聚義。亦名五陰。陰卽蓋覆義。總名積集有爲。蓋覆眞性也。

本空寂

心經云。照見五蘊皆空。度一切苦厄。先以色不異空。空不異色。色卽是空。空卽是色。四句顯色蘊空。次云。受想行識亦復如是。二句例四蘊空。既五蘊皆空。則當處

寂滅矣。

六根

眼耳鼻舌身意

眼能見。耳能聞。鼻能嗅。舌能嘗。身能覺。意能知。

此六根

根即能生之義。以能生六識故。有浮塵根。勝義根之別。浮塵根者。眼如葡萄。耳如新卷葉。鼻如雙垂爪。舌如初偃月。身如腰鼓。頰意如幽室。見勝義根者。即如來藏性。顯發妙用。寄於六根。而能見聞。嗅嘗覺知也。

應須記

當知浮塵根。因四大假合而成。若非勝義根。即同死人。

六塵

色聲香味觸法

色謂明暗質礙等。聲謂動靜美惡等。香謂通塞香臭等。味謂鹹淡甘辛等。觸謂離合冷暖等。法謂生滅善惡等。

此六塵

塵即染汙之義。以能染汙情識。而使真性不能顯發故。又名六賊。以能劫奪一切善法故。

亦須識

識得塵即是賊。不被他染汙劫奪。則賊爲我用。能以六塵而作佛事矣。

十二處

前六根與六塵十二處常相親

處者方所也。言根在內。塵在外。眼唯對色。耳唯對聲等。各有一定方所。若融歸真性。則無

方所得矣。亦名十二入。以內六根外六塵互相涉入故也。

十八界

根塵接有六識

眼識。耳識。鼻識。舌識。身識。意識。

十八界從此立

界者。各成界限也。六根爲內界。六塵爲外界。六識爲中界。眼根色塵內外相對。於其中間生於眼識。則成三界。六根六塵相對而生六識。

則成十八界。若融歸真性。則無界限可得矣。

轉八識成四智

末那識爲第七。阿賴耶第八識。八種識爲心王。

上文六識。眼耳鼻舌身爲前五識。意爲第

六識。末那爲第七識。卽染汙意也。阿賴耶爲第八識。卽含藏識。去後來先作主公者也。此八種識。名爲心王。以染淨諸法。由此而生。故上明八識。下明四智。

轉成智性發光

如來藏性爲識所障。其光不顯。若轉成四智。則性地發光矣。下列四智名。

大圓鏡

轉第八識爲大圓鏡智。

平等性

轉第七識爲平等性智。

妙觀察

轉第六識爲妙觀察智。

成所作

轉前五識爲
成所作智。

此四智一心圓

四智皆從
一心圓現。

八識轉體用全

八識未轉體用狹劣。八識既轉體用全彰。大圓鏡智體也。餘三智。用也。○問楞嚴經中說五陰六入十二處十八界之後。卽說七大。此中

何以不說。答曰。雖不列七大名。而七大已具足矣。下文世界相中。地水火風空。卽是五大。上文之六根。卽是根大。八種識。卽是識大。若再標出。便成贅語。

三身

曰法身

梵語毗盧遮那。此云
徧一切處。法身佛也。

曰報身

梵語盧舍那。此云
淨滿報身佛也。

曰應身

一日化身。梵語釋迦牟尼。此云能仁寂默。應身佛也。

是三身

世人但知應身。不知法報二身故。見解狹劣。不能領會全體大用。必須透徹三身之義。方可與談此道也。

自受用

謂諸如來。內智湛然。照真法界。盡未來際。常自受用廣大法樂。

他受用

爲他機所感。而現此身。謂諸如來。由平等智。爲十地菩薩。現大神通。轉正法輪。令他受用大乘法樂。

一報身說二用

因自他受用說爲
自報身他報身

胎生身

卽八相成道之身。八相者。從兜率天退入胎。住胎。出胎。出家。成道。轉法輪。入於涅槃。

變化身

無而忽有。
種種異相。

此二種皆應身

應衆生根。
隨緣示現。

約爲三

法身。報身。應身。

開爲五

法身。自報身。他報身。胎生身。變化身。

相無定。隨機觀

法身無相可見。菩薩見報身。隨位增進。相好轉勝。二乘凡夫見應身。隨於六道各見不同。

五眼

有肉眼

假父母氣血所成。卽人中能見之眼。見近不見遠。見前不見後。見內不見外。見晝不見夜。見上不見下。因有色質障礙故也。

有天眼

諸天因修禪定而得此眼。遠近。前後。內外。晝夜。上下。皆悉能見。以無色質障礙故也。

有慧眼

二乘之人。以所得慧眼。觀一切法皆空。不見有衆生相。及滅一切異相。捨離諸著。不受一切法也。

有法眼

菩薩爲度衆生。以清淨法眼。徧觀一切諸法。能知能行。亦知一切衆生種種方便門。令修令證也。

并佛眼

佛具前四眼之用。無不見知。如人見極遠處。佛見則爲至近。人見幽暗處。佛見則爲顯明。乃至無事不見。無事不知。無事不聞。聞見互用。無所思惟。一切皆見也。

名五眼

人只一種。天具二種。二乘具三種。菩薩具四種。佛具五種。

見所見皆無限

別而言之。肉眼見現前色。天眼見障外色。慧眼見真空。法眼見俗諦。佛眼見第一義諦。似有分限。通而言之。皆無分限。何則。五眼皆是如

來藏中。性見覺明。覺精明見。清淨本然。周徧法界。所以十信位中。父母所生肉眼。徹見大千世界。能見所見。皆無限量矣。

六通

天眼通

能見六道衆生死此生彼苦樂之相。及見一切世間種種形色。無有障礙。

天耳通

能聞六道衆生苦樂憂喜。語言及世間種種音聲。

他心通

能知六道衆生。心中所念之事。

宿命通

能知自身一世二世三世乃至百千萬世宿命及所作之事。亦知六道衆生各各宿命及所作之事。

神境通

身能飛行。山海無礙。於此界沒。從彼界出。於彼界沒。從此界出。大能作小。小能作大。隨意變現。神通自在。

漏盡通

漏卽三界見思惑也。阿羅漢斷見思惑盡。不受三界生死。是名漏盡。

聖與凡。各不同

外道鬼神天仙。凡通也。聲聞緣覺菩薩如來。聖通也。凡位除漏盡。只有五通。各各大小不同。聖位具六通。唯菩薩不證漏盡。隨位淺深。神

通各別。

四諦

曰苦集

苦即生死苦果。集即惑業苦。因此二者世間法也。

曰滅道

滅即涅槃樂果。道即道品樂。因此二者出世間法也。

四諦法

四法通名諦者。審實不虛。聲聞法也。

須尋討

誠令衆生厭苦斷集。慕滅修道離苦得樂也。

十二因緣

自無明至老死

無明緣行。行緣識。識緣名色。名色緣六入。六入緣觸。觸緣受。受緣愛。愛緣取。取緣有。有緣生。生緣老死。此十二因緣亦名十二有支。緣覺

法也。舉初後。以該中間耳。

十二因爲緣起

一曰無明。亦名煩惱。二曰行。謂造作諸業。此二支乃過去所作之因也。三曰識。謂起妄念。初託母胎也。四曰名色。從託胎後。生諸根形也。

五曰六入。於胎中而成六根也。六曰觸。出胎後六根對六塵也。七曰受。謂領納世間好惡等事。此五支乃現在所受之果也。八曰愛。謂貪染五欲等事也。九曰取。謂於諸境生取著心也。十曰有。謂作有漏之因。能招未來之果。此三支乃現在所作之因也。十一曰生。謂受未來五蘊之身也。十二曰老死。謂未來之身既老而死。此二支乃來世當受之果也。此十二因緣該三世因果。展轉因依。互爲緣起。無有休息。

順流轉

衆生順之。爲流轉門。

逆還滅

緣覺逆之。
爲還滅門。

當處空。無分別

菩薩見其本性空寂。無流轉還滅之可得。故心經云。無無明。亦無無明盡。乃至無老死。亦無老死盡。

六度

布施度

梵語檀那波羅密。此云布施到彼岸。言布施度者。省文也。有三種施。一財施。二無畏施。三法施。行施者。治慳貪也。

持戒度

梵語尸羅波羅密。此云持戒到彼岸。戒有三聚。一攝律儀戒。二攝善法戒。三饒益衆生戒。持戒者。治雜染也。

忍辱度

梵語羼提波羅密。此云忍辱到彼岸。忍有三種。一耐他怨害。忍。二安受衆苦。忍。三法思勝解。忍。行忍辱者。治嗔恚也。

精進度

梵語毗梨耶波羅密。此云精進到彼岸。精進有三種。一擻甲精進。二攝善法精進。三饒益有情精進。行精進者。治懈怠也。

禪定度

梵語禪那波羅密。此云靜慮到彼岸。禪有三種。一世間禪。二出世間禪。三出世間上上禪。修禪定者。治散亂也。

智慧度

梵語般若波羅密。此云智慧到彼岸。般若者有三種。一文。字般若。二觀照般若。三實相般若。修般若者。治愚癡也。

自他苦從此度

既能自度。又能度他。離苦得樂。莫不由此道也。又有說十度者。從第六度開出四度。七曰方便度。八曰願度。九曰力度。十曰智度。或疑智

度與般若度。有何分別。答曰。第六根本智。第十差別智。開之則爲十。約之仍爲六。要以第六爲宗本法也。

四無量心

慈與悲

慈名愛念。卽與樂之心。悲名愍傷。卽拔苦之心。

喜與捨

見之離苦得樂。其心悅豫。名之爲喜。於所緣衆生。無憎愛心。名之爲捨。

四無量

所緣衆生既無量。能緣之心亦無量。

稱聖者

此卽菩薩利益衆生之廣大心也。

涅槃四德

曰常樂

窮三際而無改。曰常在衆苦而不干。曰樂。

曰我淨

處聖凡而莫拘。曰我歷九相而非染。曰淨。

此四德。涅槃證

如來所證。故名涅槃四德。

十界

有情界說六凡

三惡道。三善道。輪回不息。說名有情世間。

三途苦須先論

論平聲。三途。卽三惡道。先論者。令人聞而生畏。速求出離也。

曰地獄

八大地獄。皆受火燒。亦名八熱。次則八寒地獄。又有小地獄。其數衆多。皆是五逆十惡。謗法衆生所生。○問曰。今時旣以大地爲圓球。此等地獄當在何處。答曰。八

寒地獄。應。在。兩。極。彼。處。半。年。爲。晝。半。年。爲。夜。堅。冰。成。山。高。崖。深。谷。人。不。能。至。地。獄。衆。生。在。彼。受。苦。至。日。出。時。橫。繞。地。平。而。轉。漸。轉。漸。高。至。二。十。餘。度。冰。山。因。融。化。而。移。動。有。時。相。觸。則。成。合。山。地。獄。至。於。八。熱。及。無。間。等。獄。應。在。地。球。之。內。蓋。地。球。裏。面。有。堅。固。石。殼。殼。內。大。火。充。滿。火。中。有。流。質。如。烱。銅。如。沸。鐵。卽。是。受。苦。衆。生。灌。口。炙。身。之。物。也。此。汁。隨。火。山。溢。出。變。而。爲。鐵。石。黑。色。光。亮。統。地。球。而。論。火。山。不。下。數。百。處。歷。歷。可。驗。也。

曰餓鬼

種類甚多。略說有三十六。廣說無量。皆是慳貪衆生所生。

曰畜生

此道種類極多。經中說有三十四億差別。約而言之。不出飛禽走獸。鱗介昆蟲等類。以衆生雜業感果而生其中。

苦無比

地獄極苦。餓鬼次之。畜生又次之。皆非言語所能形容也。

曰天道

欲界六天。自下向上說。四王天。忉利天。夜摩天。兜率天。化樂天。他化天。色界四禪。初禪三天。梵衆天。梵輔天。大梵天。二禪三天。少光天。無量光天。光音天。三禪三天。少淨天。無量淨天。徧淨天。四禪九天。福生天。福愛天。廣果天。無想天。無煩天。無熱天。善見天。善現天。色空竟天。無色界四天空。無邊處。識無邊處。無所有處。非非想處。三界共二十八天。欲界諸天放逸過度。天王示以未來世苦。聞者竦然。色界依禪定住。報盡亦受輪轉。無想是外道天。力盡決定墮落。唯無煩以上。名五不還天。修聖道者之所寄托。至於無色四天。或成鈍阿羅漢。或窮空不歸。迷漏無聞。轉入輪回而不自覺。

曰人道

人有八苦。生時苦。老時苦。病時苦。死時苦。怨憎會苦。愛別離苦。求不得苦。五陰熾盛苦。若能知此八苦。早求出離。則念佛往生之心。萬牛莫挽矣。

曰脩羅

梵語阿脩羅。此云非天。福力等天。而無天德。爲多瞋慢。故又有稱五道而不列脩羅者。以脩羅攝於四趣也。楞嚴經云。從卵而生。鬼趣所攝。從胎而出。人趣所攝。因

變化有。天趣所攝。因
溼氣有。畜生趣攝。

樂事少

諸天防退。人多憂惱。脩羅多
瞋。道眼觀之。何者而可樂耶。

曰聲聞

入道次第。從五停心。四念處。以至四加行。而證四果。初果。須陀洹。
二果。斯陀含。三果。阿那含。四果。阿羅漢。名無學位。聲聞之極果也。

曰緣覺

亦名辟支佛。觀十二因緣而證道果。居聲聞之
上。出有佛世。名爲緣覺。出無佛世。名爲獨覺。

取滅度。爲獨樂

斷見思惑。盡證有餘無餘涅槃。出
三界分段生死。居方便有餘土。

曰菩薩

凡夫發四宏願。精勤向道。直至十信位。名凡夫菩薩。漸教行人。從十住以去。直至
等覺位。名菩薩。菩薩圓頓行人。從十住初心。便成正覺。自此以去。位位圓修。二十

二應。隨機示。
現名佛菩薩。

曰如來

亦名婆伽梵。極果之稱。共有十號。如來。應供。正徧。知。明。行。足。善。逝。世。間。解。無。上。士。調。御。丈。夫。天。人。師。佛。世。尊。

撫衆生。如嬰孩

諸佛菩薩等觀衆生。猶如一子。常以大悲水。饒益衆生。願一切衆生。同成正覺。

此四聖

聲聞。緣覺。菩薩。如來。

并六凡

天。人。阿。脩。羅。地。獄。鬼。畜。生。

爲十界。一性含

十種法界。不出眞如自性。

器世間

既論身

上文說十
界正報。

須論土

下文說依報。經中言土
者。即所住之世界也。

土爲依

土爲
所依。

身爲主

身爲
能依。

四大洲

東弗于逮。此云勝身。南閻浮提。此云勝金。亦名南瞻部洲。
西瞿耶尼。此云牛貨。北鬱單越。此云勝處。亦名北俱盧洲。

共鐵圍

四大部洲。在須彌山四面。大
鹹水海中。外有鐵圍山圍之。

七金山

一雙持山。二持軸山。三擔木山。四善
見山。五馬耳山。六象鼻山。七持地山。

繞須彌

七重金山。七重香水海。圍繞須彌山。須彌山高八萬四千由旬。四王天居山腰。忉利天居山頂。

爲大地

一須彌山。四大部洲。大海鐵圍。共成大地。

風力持

大地之外。皆是虛空。無所依傍。爲風力所持。而得安住。

水火金不相離

水輪。火輪。金輪。互相依持。成此地輪。

水輪含十方界

楞嚴經云。寶明生潤。火光上蒸。故有水輪。含十方界。

性流動如何載

既云含十方界。則八方上下無不徧矣。水是流質。豈不散入空中。何能常附於地。

業力持得自在

乃衆生業力所持。水能含裹十方。不至散漫無歸也。

風金摩火現彩

經云。風金相摩。故有火光。爲變化性。此相摩而生之電氣。徧於寰宇。激則現出火光。近北極處。有時見半圓光彩。照耀空中。名北方曉。最

爲奇觀。變化性者。以電氣最能變化物質故也。此非上蒸之火。蓋上蒸之火。在地內。有時地裂而出。則爲火山。聲震天地。燼灰漫空而下。熱汁奮迅而流。埋沒城市。斃人無算。古時發現者。火燄至今不息。近時又有幾處發現矣。

菴摩果比閻浮

經云。阿那律見閻浮提。如觀掌中菴摩羅果。

果體圓圓如毬。彼上下與四週人與物如何留

地圓如毬。則上下四週人物如何安住。今

時環遊地球之人。向東而去。則從西歸。向西而去。則從東歸。是地形果爲圓球矣。始知羅漢天眼早已見之。佛偶然一說。令後人知種種形狀。皆隨衆生意樂所聞。如來未嘗指爲定相也。

楞嚴經秘密說善會通不可執

楞嚴經文。隱含地球之意。當知佛語。皆是活句。若執此非彼。則自生窒礙矣。○或問今時

地球之說。與釋典迥異。何也。答曰。世界形狀。皆是衆生同業妄見。猶如幻化。無有定實。佛出世時。隨衆生機感而爲說法。印度婆羅門教。先行於世。所說地形。是日月繞須彌山。環照四大部洲之境界。佛若改變其說。則是以世界爲實有矣。世界如果實有。當現華藏時。此濁惡世界。置於何所。若同處。則相礙。若異處。則相形。蓋華藏現時。娑婆卽隱。業道衆生。仍見娑婆。而不見華藏。法身大士。普見華藏。而復見娑婆。互相涉入。無雜無障。可知依正二報。如幻如化。了無質礙也。邇來地球之說。世人信以爲實。遂疑佛經所說爲非。而不知楞嚴經中。早已隱而言之。經文深密善巧。後人若會其意。自能行住坐臥。如處虛空。不作質礙想。并不作虛空想矣。○問。須彌山如何理會。答曰。君不聞芥子納須彌。須彌納芥子之言乎。須彌既能納於芥子之內。須彌不小。芥子不大。而法身菩薩親見須彌入芥子中。會得此意。則須彌山王顯於大海。正是妙明心中所現影像。忉利四王諸天。何一而非性色真空。性空眞色之所發現。執爲實有者。墮凡夫見。執爲實無者。墮外道見。離此二見。心境脫然。

日與月繞虛空

肇論云。日月麗天而不周。雖運行不息而未嘗動也。

不墮落誰之功

楚辭天問之意也。

有過去

過去如夢了無朕迹。

有現在

現在如電剎那不停。

有未來

未來如雲歛爾而起。

三世改

妄念遷流。故有去來之相。真心絕待。本無今古之殊。華嚴經云。一念普觀無量劫。無去無來亦無住。如是了知三世事。超諸方便成十力。金剛經云。過去心不可得。

現在心不可得。未來心不可得。會此意者。方不被三世轉。而能轉三世矣。又華嚴經中說十世賢首十世章中廣明。

南與北。西與東。

正四

并四維

東南西南東北。西北謂之四隅。

上下通

四正。四隅爲八方。加上下通爲十方。

觀十方人在中

中無定所。卽以自所立處爲中。普觀十方。不出一心所攝。可謂坐微塵裏轉大法輪矣。

人居地

據近時所測。地爲圓球。人居地面。足對地心。頭皆向外。故經中有仰世界。覆世界。側世界之說。又測得地球每日自轉一周。每年繞日行一大周。而成四季之寒暑。

也。經云。佛坐道場。地神作證。言我此地是金剛臍。餘方悉轉。此地不動。云云。可爲地球轉動之證。

地居空

地乃空中一彈丸耳。人在其上。眇乎小哉。

數此地至大千

世人所居之地。爲一世界。數此大地至一千。名爲小千世界。又數小千至一千。名爲中千世界。又數中千至一千。名爲大千世界。共有十

萬萬大地。通爲一佛刹。皆是釋迦佛攝化之境也。

凡聖居各有緣

六凡以罪福因緣而居此土。四聖以慈悲因緣而居此土。○或問經中所說他方世界無量無數。凡夫未得天眼。亦能略窺影像乎。答曰。

近時天文家所測者。可以比量而知。其說以日爲宗。有多數行星繞日而轉。地球其一也。自體無光。仗日光以爲明照。卽以此繞日之多數地球。作爲一小千世界。空中之恆星。與日相同。每一恆星。有多數地球繞之。卽是中千世界。推而至於大千世界。莫不皆然。凡地上之人。目所能見者。通爲娑婆大千世界。西人謂之一星林。用最大天文鏡窺之。空中有無數星林。卽是無數大千世界。又有鏡中但見白迹。不能察知星點者。西人謂之星氣。更有極大天文鏡所不能見者。尤不可思議。經中所謂十方微塵數大千世界。可於凡夫眼中略見端倪矣。

同居土

具云凡聖同居土。卽上文所說娑婆世界是也。

方便土

具云方便有餘土。佛力所現。爲二乘休息之處。亦名化城。

實報土

具云實報莊嚴土。報身佛所居。三賢十聖菩薩方能見之。

寂光土

具云常寂光土。法身佛所居。菩薩隨分見於法身。漸次證入。

分四土。自台教

各宗判教不同。分土亦異。此四土天台教所說也。

前一麤

同居土。方便土。

後二妙

實報土。寂光土。

法性土

卽理土也。爲法身所依。謂此身土體無差別。俱非色相所攝。

淨化土

攝受一類
清淨衆生。

染化土

攝受一類
雜染衆生。

分三土。賢首教如是說。從本源

法性土也。

生枝節

淨化染化
二土也。

娑婆界

染化土。

極樂界

淨化土。

華藏界

華藏莊嚴世界海。乃毗盧遮那佛所攝寶報無障礙土也。華藏界內有十不可說佛刹微塵數香水海。一一海中有一世界種。一一世界種中有二十重世界。一一

重中有無量世界於中安住中央世界種第十三重極樂娑婆均在其內。

及餘界

例十方世界海
無極無盡也。

界非界

依真諦說
界即非界。

非界界

依俗諦說
非界而界。

重重涉各無礙

入不思議解脫法門則重重涉入圓融無盡皆無障礙矣。

勸學

學佛者首在信

信爲道原功德母
長養一切諸善根。

信而解

若非正解。信則不真。

解而行

解路既通。非行莫階。

由解行。至於證

解行雙圓。可臻實證。

識次第

信解行證。四門次第。出起信論。賢首宗之。釋華嚴經。此古今不易之法也。後人不達師心自用。不求正解。而起邪行。強制妄念。以爲真修。縱能得定。轉世便失。

辨邪正

非但佛法之外。易入邪途。卽學佛者。不閱經論。不遇明師。往往走入邪途。而不自覺。慎之慎之。

宗說通

靈光獨耀。迴脫根塵。名爲宗通。深入教海。辭辯縱橫。名爲說通。

理事融

凡夫執事而昧理。二乘見理而忘事。若知全理成事。全事卽理。則得入於圓融法界。

破我執第一功

障道之深。無過我執。金剛經中四相。以我爲首。我相若破。四相全消。起信論顯示正義之後。卽說對治邪執。邪執謂何。卽人我執。法我執。

也。二執若除。二空頓顯。是爲入道之要門。

四句離

凡舉一對。便成四句。且就有無言之。若云有。是增益謗。若云無。是損減謗。若云亦有亦無。是相違謗。若云非有非無。是戲論謗。既俱有過。故須遠離。他如一異斷常。

等例此應知。

百非遣

上文四句中。每句演有無。亦有亦無。非有非無。四句。便成十六句。十六句中有過。去現在未來三世。共成四十八句。每句分已起未起。便成九十六句。帶根本四句。

卽成百句。皆無實義。故云非也。由破我執之功。則四句百非。纖毫不起矣。

妄念消。真性顯

真性爲妄念所障。隱而不現。妄念若消。真性自然顯露。此爲修行之極則也。○上來十六句。皆就凡位解釋。若通凡聖。須分二門。先就次。

第門。依起信論說。信卽十信位。解卽十解位。亦名十住位。行卽十行位。并十回向位。證卽十地位。歷位進修。須經三阿僧祇劫。方證佛果。次就圓頓門。依起信論說。若離於念。名爲得入。古德云。一念相應。一念佛。念念相應。念念佛。經云。不歷階位。而自崇最。名之爲道。若欲知二門同異之旨。須閱大宗地立文本論。

敘述古德

古之人。行履篤。

處世純厚。

言不誑。

出言誠實。

心不曲。

居心正直。

守清素。如慧開。

梁時吳郡人。以講經名。世住揚都彭城寺。

竭盡施。不積財。

豫章太守謝謏。請師講經。厚加遺贖。晉安太守劉業。知師屢空。施錢一萬。師散給貧窮。頃刻都盡。

自潔者。如道林。

同州人。居太白山。屢詔不出。臨終。天樂鳴空。異香盈室。

入深山。遠女人。

師匿跡幽巖。路絕攀躋。終身不見女人。以成其清潔之志也。

尊師者。如道安。服苦役。心自甘。

魏常山人。十二歲出家。性敏形陋。師輕視之。使服苦役。曾無怨容。讀經萬言。一日而畢。背

誦無差。後遇神僧佛圖澄。深入堂奧。佛法由此大行。

孝親者。如道丕。爲養母。自忍飢。

後周道丕。唐宗室也。七歲出家。年十九。長安亂。作負母入華山。值歲大饑。不自辟穀。乞食

母。供。

父捐軀。爲報國。不苦求。骨躍出。

其父從征。歿於戰地。遵母命。往收遺骸。至則白骨徧野。無從辨識。丕竭誠祝之。注想不移。

有骷髏從骨中躍出。奉之歸葬。其精誠所感如此。

高尚者。如道恆。避榮命。入山深。

道恆。藍田人。年二十出家。秦主姚興。欲奪其志。畀之高位。雖令羅什。道碧。二大德勸諭。亦

不肯從。避入深山。以終老焉。

感應者。如道生。石點頭。聽講經。

姓魏。鉅鹿人。爲羅什門下四聖之一。時涅槃經來。文未全。師獨唱一闌提。人亦有佛性。衆

僧以其違經而擯之。師至吳郡虎丘山。聚石爲徒。爲之講經。至闌提。有佛性處。師曰。如我所說。契佛心否。羣石皆點頭。後居廬山。於講經時。踞師子座而逝。

求通經。如靈辨。骨肉穿。妙義顯。

後魏沙門靈辨。博通三藏。惟於華嚴不能明徹。乃入清涼山。求文殊開示。戴經行道。肉盡。

骨穿。忽聞空中有聲。教以研究經文。遂豁然大悟。造論一百卷。演義釋文。窮微洞奧。

冲舉者尼淨檢。凌霄去身冉冉。

晉淨檢。本姓仲。彭城人。聞法信樂。先受十戒。同志二十四人。共立竹林寺。後受具戒。晉土

有比丘尼自檢始。檢蓄徒養衆。清雅有則。說法教化。如風靡草。至年七十。忽聞殊香。芬馥并見赤氣。有一女人。手把五色花。自空而下。檢見欣然。與衆話別。騰空而上。所行之路。有似虹

蜺。直屬於天。

神解者李通玄。華嚴論千古傳。

李長者通玄。唐宗室子也。學無常師。迹不可測。嘗遊五臺。逢異僧授以華嚴大旨。長者將

著論釋經。遇一虎。導至神福山下。就土龕居焉。長者夕吐白光。以代燈炬。有二女子。執侍供饌。著論畢。女子遂去。不復見。年九十六。端坐示寂。白光從頂而出。上徹於天。後人稱爲方山

者。長

機捷者。靈照女。老龐公。徒延佇。

唐靈照。襄陽人。龐蘊居士之女也。隨父母市鬻竹器以自活。其父將入滅。謂靈照曰。視日

早晚。及午以報。靈照遽報曰。日已午矣。而有蝕也。其父避席臨窗。靈照即據榻。跣坐而逝。其父笑曰。吾女機捷矣。乃拾薪爇之。展期七日而化。

舉十德

歷舉古德十人。七比丘。一比丘尼。一居士。一女人。四衆備矣。

勵初學

以古德高風。策勵後進。

依此修。成正覺

若能效法先德。一意勤修。雖根有利。鈍證有遲速。畢竟能成無上菩提。

餘韻

三字偈

釋典中偈頌。有四字。五字。七字。成句者。三字。六字。偶一見之。今以三字成句。四句爲偈。凡一百八十三偈。

隨分說

就初學所應知者約略言之

如風過萬籟歇

上來衆多句義。如風起時。萬籟齊發。至此將完。如風過時。萬籟都息。此語出莊子齊物論。

非有言

真空觀

非無言

妙有觀

會此意是真詮

空有圓融。入中道第一義諦。

佛教初學課本註解終

迴向文

願以此功德

莊嚴佛淨土

上報四重恩

下濟三途苦

若有見聞者

悉發菩提心

盡此一報身

同生極樂國

